

**ԱԶԳԱՅԻՆ ՓՈՔՐԱՄԱՍՆՈՒԹՅՈՒՆՆԵՐԻ
ՆԵՐԿԱՅԱՑՈՒՑԻՉՆԵՐԻ ՀԱՆԴԻՊՈՒՄԸ
ՎԵՀԱՓԱՌ ՀԱՅՐԱՊԵՏԻ ՀԵՏ**

Հունիսի 15-ին Մայր Աթոռ Ս. Էջմիածնում Ն.Ս.Օ.Տ.Տ. Գաբեգին Բ Ծայրագույն Պատրիարք և Ամենայն Հայոց Կաթողիկոսն ընդունեց Կրթության, գիտության, ազգային փոքրամասնությունների և կրոնի գծով ՀՀ նախագահի խորհրդականին կից ստեղծված ազգային փոքրամասնությունների ներկայացուցիչներից կազմված մարմնի անդամներին՝ ուղեկցությամբ Կրթության, գիտության, ազգային փոքրամասնությունների և կրոնի գծով ՀՀ նախագահի խորհրդական տիար Սերգո Երիցյանի: Հանդիպմանը մասնակցում էին ներկայացուցիչներ ռուսական, աստրական, հրեական, եգիպտական, քրդական, ուկրաինական, բելառուսական, լեհական, վրացական և հունական համայնքներից: »»

Հանդիպման կարևորությանն անդրադարձավ տիար Սերգո Երիցյանը՝ շնորհակալություն հայտնելով Վեհափառ Հայրապետին ընդունելության և ցուցաբերած ուշադրության համար: «Մենք գիտենք, որ Դուք Ձեր գործունեության մեջ երբևէ տարբերություն չեք դրել, այլ ընդհակառակը՝ միշտ զորացրել եք ժողովուրդների միջև բարեկամության ոգին», - նշեց ՀՀ նախագահի խորհրդականը՝ կարևորելով նաև համագործակցությունը Հայ Եկեղեցու հետ: Տեղեկացվեց, որ ստեղծված մարմինը հնարավորություն է ընձեռում ազգային փոքրամասնություններին՝ ներկայացնելու իրենց խնդիրները, նաև, որ հիմնվել է կրթամշակութային կենտրոն, ուր տարբեր համայնքների ներկայացուցիչներ հնարավորություն են ստանում կազմակերպելու իրենց միջոցառումները:

Այնուհետև ներկաներին իր խոսքն ուղղեց Ամենայն Հայոց Կաթողիկոսը: Վեհափառ Հայրապետն իր գոհունակությունը հայտնեց նման համախումբ հանդիպման համար: Նորին Սրբությունը ողջունեց այն հոգաձու մտտեցումն ու վերաբերմունքը, որ իշխանությունների կողմից դրսևորվում է ազգային փոքրամասնությունների նկատմամբ: «Ուրախալի է, որ դուք ունեք բոլոր հնարավորություններն ու կարողությունները ձեր ազգային ավանդությունները, լեզուն, մշակույթն ու արժեքները պահպանելու և լինելու հպարտ քաղաքացիները այս երկրի: Ձեր ներկայությամբ այստեղ դուք կամուրջ եք, դեսպաններն եք ձեր ժողովուրդների, բարեկամական կամուրջ եք, որ նետված է եղբայրության ու սիրո ոգին գորացնելու և մեր երկիրը նաև ճանաչելի դարձնելու ձեր ժողովուրդներին», - նշեց Նորին Սրբությունը՝ հորդորելով նրանց պահպանել ազգային իրենց դիմագիծը և որպես հավատարիմ քաղաքացիներ իրենց կարելին ներդնել ի բարօրություն Հայաստանի:

Հանդիպման ավարտին Նորին Սրբությունը պատասխանեց ներկաների հարցերին:

*ՄԱՅՐ ԱԹՈՒ ՍՈՒՐԲ ԷԶՄԻԱԾԻՆ
ՏԵՂԵԿԱՏՎԱԿԱՆ ՀԱՄԱԿԱՐԳ*